

共同經課-1 列王紀下五章一節～十四節

1A-lân 王 ê 軍長 Nái-bân, tī 伊 ê 主人 ê 面前做大, 做尊貴, 因為耶和華 bat 用伊 hō A-lân 得勝, 伊也是大權能 ê 勇士; 總是 thài-ko。2 前 A-lân 人 kui 陣出去, tùi 以色列地掠一個 cha-bó-gín-ná; 伊就伺候 Nái-bân ê bó。3 伊 kā 伊 ê 主母講, 苦 boē 得 tiòh 我 ê 主 kap 撒馬利亞 ê 先知相 kap tī-teh, 伊的確能醫好伊 ê thài-ko。4 有人入去 kā 伊 ê 主講, 屬以色列地 ê cha-bó-gín-ná án-ni án-ni 講。5A-lân 王講, 你去 ah, 我也 beh 寄一張 phoe hō 以色列王。Nái-bân 就去, 帶銀十 tha-liân-tek, 金六千, 衣裳十套; 6 帶 phoe 到以色列王 hia。phoe 內講, Phoe 到你 hia ê 時, 看 ah, 我差人臣 Nái-bân 去見你, 你 tiòh 醫好伊 ê thài-ko。7 以色列王看 phoe 了, 就拆裂伊 ê 衫, 講, 我 kiám 是上帝, hō 人死, hō 人活 mah? Chit 人竟然差人來我 chia, kah 我醫好伊 ê thài-ko; 請 lín chim-chiok 想, 看 chit 人怎樣 chhē 縫攻擊我。8 上帝 ê 奴僕以利沙聽見以色列王拆裂伊 ê 衫, 就差人去見王講, 你啥事拆裂衫 ah? Thang hō hit 人到我 chia, 伊 chiah 知以色列中有先知。9Nái-bân 就 kap 伊 ê 馬, 伊 ê 車來, khiā tī 以利沙 ê 厝門口。10 以利沙差一個使者, kā Nái-bân 講, 你去約旦河洗身軀七 pái, 你 ê 肉就復原, 你 beh 得 tiòh 清氣。11Nái-bân 就受氣, 退去, 講, 我本 phah 算伊的確 beh 出來見我, khiā-teh 求叫耶和華伊 ê 上帝 ê 名, 搖手 tī 患 tiòh ê 所在, 來醫好 thài-ko-ê。12 大馬色 ê 河, A-pa-ná kap Hoat-jī<sup>n</sup>-hoat, kiám 無比以色列一切 ê 水 khah 好 mah? 我 tī-hia 洗身軀 boē 得 tiòh 清氣 mah? 就 oát-tng 身受氣, 做伊去。13 伊 ê 奴僕進前, kā 伊講, 我 ê 父 ah, 先知若 kah 你去做一件大事, 你 kiám 無 beh 做 mah? 何況伊 kan-ta kā 你講, 洗就清氣 ah? 14Nái-bân 就落去, 照上帝奴僕 ê 話, tī 約旦河洗七 pái; 伊 ê 肉復原, 親像 gín-ná 肉, 伊就清氣。

共同經課-2 詩篇三十篇

1Chit-ê 詩是獻宮殿 ê 歌; 大衛做 ê。1) 耶和華 ah, 我 beh 尊重你做至高, 因為你 bat 提拔我, 無 hō 我 ê 仇讎對我誇口。2 耶和華我 ê 上帝 ah, 我 bat 求叫你, 你就醫好我。3 耶和華 ah, 你 bat 救我 ê 靈魂 tùi 陰間起來。你 hō 我活 teh, 免致入墓。4 耶和華聖 ê 百姓 ah, lín tiòh 唱歌 o-ló 伊, 記念伊 ê 聖名來感謝 I。5 因為伊 ê 受氣不過目 nih 久; 伊 ê 恩典是一生 ê 久; Kui 暝雖然有啼哭, 早起時就有歡喜。6 論到我, 我 tī 興通 ê 時就講, 我永 boē 搖 choah。7 耶和華 ah, 你 bat 施恩, hō 我 ê 山 khiā 在堅固, 你掩你 ê 面, 我就擘腹。8 耶和華 ah, 我求叫你; 我對耶和華求恩, 講, 9 我流血, 我入墓, 有啥利益? 塵埃 kiám 會 o-ló 你? kiám 會報揚你 ê 真實 mah? 10 耶和華 ah, 求你聽我, 憐憫我; 耶和華 ah, 求你幫贊我。11 你已經將我 ê 啼哭變做跳舞; 你將我 ê 麻衫 thng 去, 用歡喜 kā 我 hā; 12Thang hō 我 ê 心神唱歌, o-ló 你, 亦無靜靜。耶和華我 ê 上帝 ah, 我 beh 感謝你, 到永遠。

共同經課-3 哥林多前書九章二十四節～二十七節

24Kiám m̄ 知在場 tàu 走 ê tàk-ê lóng 走, 但是得 tiòh 報賞 ê 只有一個; lín tiòh án-ni 走 chiah thang 得 tiòh。25 見若鬥力 ê tàk 項事攔節; in 是 beh 得 tiòh 會敗壞 ê 冕旒, 但是咱是 beh 得 tiòh boē 敗壞 ê。26 所以我 án-ni teh 走, m̄ 是親像無定 tiòh ê 方向; 我 phah 拳, 無親像 teh phah 空氣; 27 我 phah 我 ê 身軀到 thiám-thiám, hō 伊降服; 驚了我已經傳 hō 別人, 本身 kiám-chhái tú-tiòh 拒絕。

共同經課-4 馬可福音一章四十節～四十五節

40 有一個 thài-ko ê 就近伊, 求伊, 跪伊, kā 伊講, 你若肯, 就會 hō 我清氣。41 耶穌可憐, 伸手摸伊, kā 伊講, 我肯, 你 thang 清氣。42Thài-ko 即時除去; 伊就清氣。43 耶穌嚴嚴警戒伊, 隨時 kah 伊去; 也 kā 伊講, 44Tiòh 謹慎莫得 kā 人講甚麼; 獨獨 tiòh 去, 將本身 hō 祭司驗, 亦為 tiòh 你得 tiòh 清氣, 獻摩西所吩咐 ê, 來做證據 tī 人。45 總是伊出去, 就大大宣傳, 四界報揚 chit-ê 事; 致到耶穌無 thang koh 顯然入城, 獨獨 toà tī 外面曠野 ê 所在。人 tùi 四方就近伊。